

LXVIII.

Lettre du Prince d'Orange aux quatre membres de Flandre. — Négociation d'un emprunt de 400,000 livres. (Arch. Y.)

1579
23 Janvier.

Messeigneurs, Comme nous soyons pntement negocians avecq intervancion de vos deputez pour retrouver la some de quatre cent mille livres du prix de quarante gros monnoie de flandres avecq espoir de la pouvoir aschever par tout le jourdhuy ou demain et considerans que les marchants ne voudront proceder aucun avancement des deniers quils ne voyent prealablement les depesches requises a lendroit la dite negociation. Il nous a semble totalement requis de vous debvoir envoyer votre depute pnt porteur, avecq lacte d'ypotecque que avons icy fait concepvoir affin quil vous plaise le renvoyer en toute diligence signe en forme accoustumee pour laveoir icy a la main puisque la celerite en cest endroit tant est requise ayants les reytres expressement proteste que sy endedens le xxvii de ce mois lon ne leur donne contentement, ils entendent revoquer le dernier appoinctement fait avec eulx, que ne seroit advenir que au tres grand interest de la gñalite eu esgard au grand avantage d'icelluy appoinctement par dessus le dommage indicible que viendroict a souffrir le plat pays, vous vueillans cependant bien assurer que ne laisserons avanchier par vos dictz deputez lacte susdit sans quils ayent prealablement receu des premiers deniers a proceder de ceste d^{te} negociation les cents cinquante mille livres par vous pourparlez, et confyans que parmy ce vous ne ferez en ce que dessus aucune difficulte pour la singuliere affection que scavons vous portez au bien et soulagement du pays, ne ferons ceste plus longue, ains apres nos tres affectionnez recomandacions a vos bonnes graces prions Dieu vous maintenir.

Messeigneurs en sa sainte garde et protection, d'Anvers
le xxiii de janvier xv^e LXXIX.

Vre bien affectionne amy a vous faire service
GUILL DE NASSAU.

A Messeigneurs
Les quatre membres du pays et comté de Flandres.